

SESSANTACINQUESIMO DI ORDINAZIONE

1955 – 26 GIUGNO – 2020

Vardé gent 's'è capità
De vegh paura 'ndà foera de càa!
Colpa de quel virus stramaledett
Ch'el côpa la gent 'me fusser insett!
Inscì la festa per i sessantacinc' an
Con tanti amis e concert de campan
L'è 'ndada per aria, a fass benedì!
L'è invece gran festa, ma denter de mi.
Finissarò mai de ringrazià
De tanto ben ch'el Signor el m'ha fa
Che de vess pret som propri content
D'avè incontràa inscì tanta gent
De somenà on po' de ben, o me car Gesù
Ma l'è tanto pussé quel c'ho ricevu!
S'eri on fiolett e ho patì la guera
Adess som vecc e me met a tera
'Sto gran macell de la pandemia
Ma taccàa a Ti la scapa via
Ogni paura e come on fiolett
In brascia a Ti me tegni strett
Me senti in pas e la tua carezza
La me sfiora i cavéj 'me 'na fresca brezza.
Quel che me resta l'è ormai de 'spettà
Che se derva la porta de l'eternità
Per cantà 'l me grazie con tanti amis
Che me 'speten de Là, in Paradis.

